

Agiunta a la communicaziun a las medias "La regenza refusa l'iniziativa davart la taglia da baselgia"

Il sistem da las taglias da baselgia en Grischun

Per las taglias da baselgia ston vegnir distinguì tranter la taxaziun da las *persunas natiralas* e quella da las *persunas giuridicas*:

- Las baselgias chantunalas e lur cumins-baselgia pon incassar ina taglia da baselgia da lur commembras e commembers, q.v.d. da las *persunas natiralas*. Entant che la baselgia reformada dal chantun Grischun sco er ils cumins-baselgia reformads e catolics fan diever da quest dretg, n'incassescha la baselgia catolica dal chantun Grischun naginas taglias da las *persunas natiralas*.
- Da las *persunas giuridicas* incassescha il chantun ina taglia da cultus. Questa taglia vegn incassada en procentualas da las taglias chantunalas sin il gudogn e sin il chapital. Il cussegl grond fixescha annualmain il pe da taglia; quel importa almain 9 e maximalmain 12 pertschient. Ils ultims onns è il pe da taglia vegni fixà adina a 10,5 pertschient. Las entradas or da la taglia da cultus importan var 8 milliuns francs. Ellas vegnan surdadas a las duas baselgias chantunalas en proporziun da l'appartegnientscha da las *persunas natiralas* a las baselgias. L'iniziativa vul abolir la taglia da cultus.

Cura e pertge è vegnida introducida la taglia da cultus?

Il motiv per la taglia da cultus ch'è vegnida introducida l'onn 1959 è stada la situaziun finanziala precara da las baselgias chantunalas e dals cumins-baselgia. En differentas vischnancas eran las *persunas natiralas* gia engrevgiadas zunt fitg tras las taglias da baselgia. Tuttina n'era questa grevizza betg suffizienta per covrir il basegn finanziel da las baselgias.

Il titel da l'iniziativa n'è betg exact

Sche l'iniziativa vegn acceptada, na po il chantun betg pli incassar ina taglia da cultus da las *persunas giuridicas*. A quest resultat correspunda dentant il titel da l'iniziativa "Main taglia per il mastergn" mo per part e quai per il suandant motiv: Mastergns vegnan exequids mo per ina pitschna part en la furma d'ina *persuna giuridica* (cunzunt societads anonimas u ScRL). La gronda part dals mastergnants èn *persunas* cun activitad da gudogn independenta en la furma giuridica d'ina interpresa singula u d'ina interpresa da *persunas* (societad singula, societad collectiva u commanditara). Ma las *persunas natiralas* cun activitad da gudogn independenta n'èn betg pertutgadas da questa iniziativa. Sche l'iniziativa vegniss acceptada, na las distgargiass ella pia betg.

En il cas concret signifitga l'acceptaziun da l'iniziativa il suandant:

- La taglia da cultus vertenta scroda e la taglia da baselgia da las *persunas giuridicas* na po betg pli vegnir incassada.
- Las taglias da baselgia da las *persunas natiralas* pon vegnir incassadas vinavant, perquai ch'ellas n'èn betg l'object da l'iniziativa.
- Il chantun na po betg pagar contribuziuns per finanzia il cultus da las baselgias e da las cuminanzas religiusas. Dal cultus fan part cunzunt ils cults divins.
- Contribuziuns dal chantun a favur dal mantegniment dals edificis ecclesiastics ch'èn d'impurtanza per la tgira da monuments resp. per la cultura èn admessas er vinavant.

Communicaziun da la regenza, chanzlia chantunala dal Grischun, 7000 Cuira

Giurisdicziun dal tribunal federal

Las personas natiralas pon sortir da la baselgia, sch'ellas na vulan betg pli pajar la taglia da baselgia. Las personas giuridicas n'han betg quest dretg. Ina part da la litteratura scientifica giuridica ha vis en quai ina violaziun da la prescripziun da l'egualitad giuridica. En sia giurisdicziun permanenta dapi l'onn 1878 ha il tribunal federal confermà la cumpatibilitad cun la constituziun da l'obligaziun da pajar ina taglia da baselgia per las personas giuridicas, l'ultima giada l'onn 2010.

Cumparegliaziun interchantunala

En Svizra datti differentas soluziuns per incassar las taglias da baselgia da las personas giuridicas. Ma i constat che la gronda majoritad dals chantuns incassescha ina taglia da baselgia da las personas giuridicas. Mo en sis chantuns (AG, AR, BS, GE, SH e VD) na suttastattan las personas giuridicas a nagina obligaziun da pajar ina taglia da baselgia ed en dus chantuns (NE e TI) è la prestaziun voluntara.

Motivs cunter l'aboliziun da la taglia da cultus

- L'aboliziun da la taglia da cultus avess consequenzas gravantas per las *baselgias chantunalas*. Tar la baselgia reformada dal chantun Grischun crudass davent circa in terz da las entradas, tar la baselgia catolica dal chantun Grischun passa 90 pertschient. Questa gronda differenza resulta dal fatg che la baselgia catolica dal chantun Grischun n'incassescha naginas taglias da las personas natiralas. Sche l'iniziativa vegniss acceptada, na pudess ins betg pli finanzia in gronda part da las atgnas purschidas da la baselgia che sa chattan ordaifer il sectur da cultus. Pertutgads fissan tranter auter la lavur da giuventetgna sco er ils posts da cussegliazion per dumondas da vita e da partenadi. D'aggiuntar èsi che las baselgias chantunalas na pudessan betg pli sustegnair differentas *instituziuns* che stattan a disposiziun a tut las personas, independentamain da lur confessiun. En consequenza da quai fissan divers posts da cussegliazion, sco per exempel la Caritas, periclitads en lur existenza.
- Cun sias incumbensas e prestaziuns *distgargian las baselgias il stadi*. Er per la societad adempleschan ellas *funziuns socialas e caritativas* sco er *intermediativas* essenzialas. Da quai profitan indirectamain er las personas giuridicas. D'aggiuntar èsi che circa 80 % da tut las abitantas ed ils abitants dal chantun Grischun fan part d'ina baselgia chantunala e pia èn obligads da pajar la taglia da baselgia. Perquai èsi anc adina dretg ed impurtant che las personas giuridicas prestian ina *contribuziun da solidaritad* en la furma da la taglia da cultus.
- Las duas baselgias chantunalas pajan per il mantegniment dal grond dumber d'edifizis ecclesiastics ch'èn impurtants historicamain contribuziuns annualas da circa 2,2 milliuns francs. Senza la taglia da cultus fiss periclità il mantegniment da quests edificis e stuess vegnir finanzia cun auters meds finanzia. Quests *monuments architectonics* èn ina part impurtanta da l'ierta culturala dal chantun e caracteriseschan ses maletg.
- Las *contribuziuns da gulivaziun* da la baselgia catolica dal chantun Grischun en l'import da circa 2 milliuns francs als circa 70 dals totalmain 125 *cumins-baselgia catolics* crodassan davent. Quai als *indebliss*.
- En cas d'ina aboliziun da la taglia da baselgia s'oppona a las *consequenzas finanzia* gravantas per las baselgias mo ina *distgargia marginala* da las *persunas giuridicas*. Da las circa 12 000 personas giuridicas na pajan circa 48 pertschient nagina taglia da cultus e circa 38 pertschient ina taglia da cultus da mo 200 fin 400 francs. L'aboliziun da la taglia da cultus gida pia mo minimalmain a meglierar la posiziun dal Grischun sco piazza economica. La taglia da cultus n'è pia betg in dischavantatg dal lieu per il Grischun.